



# Cumün da vaschins Zernez

---

## Protocol

### **Radunanza da vaschins da gövgia, als 29 avrigl 2021, a las 20.00, i'l auditori dal center dal Parc Naziunal Svizzer a Zernez**

Preschaints: 13 vaschinas e vaschins cun dret da vuschar

S-chüsats: Anni Tscharner-Tschander, Mattias Bulfoni, Peider Saluz e Mirco Depeder

## **Tractandas:**

### **1. Salüd e bivgnaint**

### **2. Tscherna dad ün fin duos scrutinadurs**

### **3. Protocol da la radunanza dals 10 december 2020**

### **4. Natüralisaziuns**

- Dumonda da sar Werner Karl Heinz Weisbecker, Susch per dvantar vaschin da Zernez

### **5. Contrats da barat da terrain Güstizia – Gondas**

- Gian Reto Minsch, cumün da vaschins e cumün politic da Zernez
- Christian Patscheider, cumün da vaschins e cumün politic da Zernez
- Cumün da vaschins e cumün politic

### **6. Contrats da dret da fabrica ouvra electrica Sarsura**

- Contrats da dret da fabrica
- Contrat per metter aint il terrain la lingia da pressiun

### **7. Chasa pravenda Zernez**

- Dumonda per la cumpetenza da trattar regard ün contrat da barat tanter il cumün da vaschins e la corporaziun evangelica

### **8. Orientaziuns e varia**

---

#### **1. Salüd**

Il president salüda la radunanza e giavüscha la buna saira. El constatescha cha la bannida es ida oura per temp sco üsità e cha la radunanza es abla da decider. El preschainta la glista da tractandas e lascha approvar quella da la radunanza.

#### **2. Tscherna da duos scrutinadurs**

Sco scrutinadur vain tschernü Fabian Schorta.

---

### **3. Protocol da la radunanza dals 10 da december 2020**

Il protocol es stat expost illas assas nairas e sulla pagina d'internet dal cumün. El vain approvà sainza discussiun.

### **4. Natüralisaziuns**

Sar Werner Karl Heinz Weisbecker abita a Susch daspö passa 10 ons. Eir sch'el accumplischa quist on seis 94avel anniversari ha el fat la dumonda per dvantar vaschin da Zernez ed uschè eir citadin Svizzer.

Al cumanzamaint da quist on, als 16 favrer, esa gnü confermà da Cuoira cha la documainta e las pretaisas legalas per ün vaschinadi sajan examinats e sajan in uorden. Als 20 dad avrígħ han il president e l'actuar fat cun el il discours da natüralisaziun. Els e la suprastanza propuonan dad acceptar la dumonda.

El ha ün domicil sainza interrupziun a Susch daspö ils 14 da marz 2011. Sper üna part da discours per examinar sias cugnuschentschas dal pajais, chantun e regiun es eir il passà dal candidat per la natüralisaziun stat d'importanza. Sar Karl Heinz Weisbecker es nat als 28 da mai 1927 a Düsseldorf ingio ch'el es per part creschü sü avant ch'el es rivà cun seis genituors a Garmisch in Bavaria. Cuort davo la seguonda guerra mundiala cun üna età fich giuvna, es sar Weisbecker dvantà independent ed ha cumanzà a far affars cun maschinas da seguonda man ch'el cumpraiva e mettaiva ad ir per vender. Impraisas chi han fabrichà grüs sün autos e grüs per hallas da material sun stats ils prossems affars ch'el ha fundà, avant co as dedichar a la fabrica da hallas da producziun e magazin sco plü tard eir da chasas in Bavaria ed in America dal Nord. Fin ch'el ha tut domicil a Herisau e lura a Susch in Svizra ha el per part amo manà ed as partecipà vi da quists affars e pür cun passa 80 ons s'ha el retrat our dal muond d'affars. Uossa es el il plü vegl abitant da nos cumün e voul dvantar eir vaschin da quel. La radunanza ha approvà sia dumonda da vaschinadi sainza cuntravusch cun üna abstensiun.

### **5. Contrats da barat da terrain Güstizia – Gondas**

In connex cun metter suot terra las lingias da forza electrica tras l'Engiadina Bassa, es gnüda schlargiada e renovada eir la via chi maina da Gondas giò la Güstizia. In quel connex ha il cumün politic cumprà oura la via fin giò'n Chasuot, ingio cha la via maina da la prada aint il god. In quel connex han stuvü gnir fattas diversas correcturas culs cunfins da parcellas. Quellas vegnan stipuladas in traís contrats tanter ils seguaints possessurs da terrain.

- Gian Reto Minsch, cumün da vaschins e cumün politic da Zernez
- Christian Patscheider, cumün da vaschins e cumün politic da Zernez
- Cumün da vaschins e cumün politic

Tuot in tuot dà il cumün da vaschins giò terrain e survain terrain cun quai cha per part dvainta la via il cunfin tanter prada e god, e da l'otra vart causa cha ün bun toc via müda possessur eir dal cumün da vaschins pro'l cumün politic.

Il president e l'actuar han orientà sur dals müdamaints da possess ed han respus a dumondas. Per finir ha la radunanza decis dad approvar ils contrats preschantats. Il prüm da quels, sainza cuntravusch cun üna abstensiun ed ils ulteriurs duos cun unanimità da vuschs.

## **6. Contrats da dret da fabrica ouvra electrica Sarsura**

Tant l'inchasch d'aua sco eir la centrala cun la turbina da l'ouvra electrica Sarsura chi dess gnir fabrichada da la OESS, dessan gnir fabrichadas cun contrats da dret da fabrica sün terrain da vaschins. Implü dess la lingia da pressiun eir gnir missa suot terra tras duos parcellas dal cumün da vaschins. Preschantats per approvar vegnan dimena ils contrats da dret da fabrica per l'inchasch dad aua e per la fabrica da la centrala e sco terz la cunvegna da dret da passar cun la lingia da pressiun. Il president e l'actuar preschaintan ils plans ed eir ils contrats vegnan preschantats. Per finir approva la radunanza ils duos contrats da dret da fabrica per l'inchasch e la centrala, sco eir il contrat da servitut per passar cun la lingia da pressiun, tuots traus cun unanimità da vuschs

## **7. Chasa pravenda Zernez**

La Chasa pravenda in Runatsch a Zernez es in possess dal cumün da vaschins. Il cumün politic ha l'usufrüt da quella e la corporaziun evangelica es fittadina da la chasa cun ün dret da pudair tour a fit quella a lunga vista scrit aint il cudesch fundiari. Quel dret düra 60 ons ed ils prüms 20 da quels sun intant scadüts. Dürant ils ultims ons ha il cumün politic dumandà fingià duos voutas a la corporaziun evangelica, sch'ella nu füss pronta da renunzchar sün seis dret, per cha la chasa pudess gnir vendüda. Sün quai ha la corporaziun evangelica fat üna proposta da far üna cunvegna da barat e cumpra per la Chasa pravenda.

Causa chi gnissan uossa da far plüssas investiziuns inevitablas, nun es il cumün politic interessà vi da las relaziuns da possess e vendess il plü gugent la chasa. Neir la corporaziun evangelica nun ha plaschair scha las investiziuns necessarias vi da la chasa gnissan fattas be cun stainta e fadia. Perquai propuona quella da dar in barat seis possess a Lavin (l'abitaziun da pravenda in chasa da scoula veglia ed eir terrain agricul) e pajar la differenza per dvantar svess possessura da la Chasa pravenda a Zernez.

Causa chi douvra trattativas tanter tuots traus partecipats (cumün da vaschins, cumün politic e corporaziun evangelica), dumonda la suprastanza dals vaschins a la radunanza in üna dumonda da princip, scha ella po gnir incumbenzada da la radunanza dad entrar in trattativas per realisar la proposta.

La radunanza dà quella incumbenza a la suprastanza cun unanimità da vuschs.

## **Orientaziuns e Varia**

Il president da vaschins, Rico Zala, orientescha cha daspö l'ultima radunanza nun haja dat ingünas natüralisaziuns simplifichadas.

Da la tractanda varia nu vain fat oter adöver.

La radunanza po gnir serrada a las 20.43

Il president:

Rico Zala

L'actuar:

Hermann Thom